

मार्निंग डोगरी न्यूज़ बुलेटिन, समे. 09-20 Hrs

<><><><><><>

Headlines

1. सुप्रीम कोर्ट नै भारती स्टेट बैंक गी बीरवारें तोड़ी चुनां बांड कन्नै जुड़ी दी पूरी जानकारी दा खुलासा करने दी हिदायत कीती ऐ।
2. प्रदेश जांच अर्जेसी एसआईए नै नशीले पद्धार्थे दा गिरोह चलाने आले दऊं जने खलाफा चार्जशीट दाखल कीती ऐ।
3. प्रशासन प्रदेश च चुनां आचार संहिता गी सख्ती कन्नै लागू करोआ करदा ऐ। लसैस आले थेआर जमा कराने ते नकदी दे चलन समेत नेकां हिदायतां जारी कीतियां गेइयां न।
4. रामबन दी दलवास थाहरे सड़कें दी मरम्मत दे कम्मै करी जम्मू श्रीनगर राश्ट्री जरनैली सड़कें पर ट्रैफिक बंद रखी गई ऐ।

<><><><><><>

Supreme Court

सुप्रीम कोर्ट नै भारतीय स्टेट बैंक गी बीरवारे तोड़ी चुनावी बांड कन्नै सरबंधी हर चाल्ली दी जानकारी सांझा करने दा आदेश दित्ता ऐ। सुप्रीम कोर्ट नै बैंक गी अकोहृदे बांड नंबर बी सांझा करने लेई आक्खेआ ऐ जेहदे कन्नै चुनावी बांड खरीदने आले ते राजनैतिक पार्टी बशकार सरबंधे दा बी पता लगगी सकै। मुख्ख न्यायधीश डी.वाई.चन्द्रचूड़ हुंदी अध्यक्षता आले 5एं जजे आले संवैधानिक बैच नै एसबीआई दे चेयरमैन गी हुक्म दित्ता ऐ जे ओ 21 मार्च थमां 5 बजे तोड़ी अदालतै च इक हल्फनामा जमा करान जेहदे च लिखे दा होए जे बैंक ने चुनावी बांड सरबंधी सारी जानकारी सांझा करी दित्ती ऐ।

<><><><><><>

Bulgaria President

बुलगारिया दे राष्ट्रपति रूमेन रादेव होरें बुलगारिया दे समुंद्री जहाज एम.वी.रूएन दे अपहरण मगरा भारतीय नौसेना पास्सेआ सफलता नै बचाह अभियान चलाने ताई आभार व्यक्त कीता। इक सोशल मीडिया पोस्ट उप्पर राष्ट्रपति रादेव होरें भारतीय नौसेना दा उंदे समुंद्र जहाज दे अमले ते बुलगारिया दे 7 नागरिकें गी बचाने ताई धन्नबाद कीता। बुलगारिया दे इस समुंद्री जहाज गी पिछले ब'रे दिसम्बर म्हीने अरब सागर च समुंद्री डाकुएं अगवा करी लैता हा ते भारतीय नौसेना नै इक योजनाबद्ध तरीकें कन्नै अमले गी छुड़ाई लैता ते डाकुएं गी गिरफ्तार करी लैता।

<><><><><><>

US Security

रक्षामंत्री राजनाथ सिंह होरें कल अमरीका दे रक्षामंत्री लॉयड आस्टिन हुंदे कन्नै टैलीफोन उप्पर गल्लबात कीती ते दौनें मंत्रिएं दपक्खी, इलाकाई सुरक्षा ते रक्षा साथ-सैह्योग जनेह मसलें पर चर्चा कीती। उनें पिछले म्हीने नमीं दिल्ली च होए सिंधु-X शिखर सम्मेलन ते त्रौनें सेनाएं दे दपक्खी अभ्यास Tiger Triumph बी शामिल ऐ। अमरीका दे रक्षामंत्री होरें हिंद महासागर च भारतीय नौसेना आस्सेआ समुंद्री डाकुएं खलाफ चलाए जा'रदे अभियान दी सराहना कीती। दौनें मंत्रिएं पिछले ब'रे सम्पन्न होए दे भारत-अमरीका रक्षा साथ सैह्योग खाके गी लागू करने दे तौर-तरीकें बारे बी गल्लबात कीती।

<><><><><><>

SIA

राज्य जांच अजेंसी नै नशीले पद्धार्थे ते आतंकवाद गी माली मदाद देने आले गिरोह दे दऊं व्यक्तिएं खलाफ चार्जशीट दाखल कीती ऐ। इंदे च लश्करे तैयबा दा इक आतंकवादी बी शामिल ऐ। एह चार्जशीट राष्ट्री जांच कनून तैहत बनाई गेदी विशेष अदालत च जहीर अहमद खोजा ते जमीर अहमद लोन खलाफ दायर कीती गेई ऐ। कश्मीर घाटी दा रौहने आला लोन लश्करे तैयबा दा मकबूजा कश्मीर थमां कम्म करने आली सक्रिय आतंकवादी ऐ जिसलै के खोजा गी 25 करोड़ मुल्लै दे नशीले पद्धार्थे कन्नै पिछले ब'रे सितम्बर म्हीने गिरफ्तार कीता गेआ हा।

<><><><><><>

LG-Seaman

लापता होए दे जम्मू दे नाविक साहिल वर्मा दे घरै आलें कल राजभवन जम्मू च उपराज्यपाल मनोज सिन्हा हुंदे कन्नै मलाटी कीती। उपराज्यपाल होरें साहिल वर्मा दी सुरक्षत वापसी पक्की करने आस्तै प्रशासन थमां हर

चाल्ली दी मदाद दा भरोसा दुआया। चेता होग जे घौ-मन्हासां दे बसनीक नाविक साहिल वर्मा 27 फरवरी गी भारती नौसेना दे समुंद्री जहाज थमां लापता होई गेआ हा।

<><><><><><>

NDMA-Conference

राश्ट्री आपदा प्रबंधन प्राधिकरण एनडीएमए दे मिंबर राजेन्द्र सिंह होरें जोर देइयै आक्खेआ ऐ जे समुदायिक नेतृत्व आली आपदा प्रबंधन पैहल, कठिन कोला कठिन इमरजंसी आले हालात कन्नै निबडने लेई बी महत्वपूर्ण ऐ। नमीं दिल्ली च 'उद्योगिक सुरक्षा ते अपातकाल जोखम गी घट्ट करना" विषय पर लोआए गेदे दऊं रोजा सम्मेलन च राजेन्द्र सिंह होरें आक्खेआ जे आपदाएं-करोपिएं कोला पैदा होने आले खतरें गी घट्ट करने लेई हर चाल्ली दी तैआरी, हर धड़े आस्सेआ करियै रखना गै असल ते पूरी तैआरी ऐ। उनें आक्खेआ जे सुरक्षा ढांचे गी मजबूत करने ते अपातकाल खतरे दे प्रबंधन लेई उद्योगें गी टीम इंडिया आले नजरियै कन्नै कम्म करने दी लोड़ ऐ। उनें आक्खेआ जे अपात स्थिति कन्नै निबडने लेई केन्द्र सरकार, राज्य सरकारें ते होरने संगठनें सनें आम जनता दा सैहयोग बी बड़ा लाजमी ऐ।

<><><><><><>

MCC-General

लोकसभा चुनाएं दी घोषणा दे बाद केन्द्र शासत प्रदेश च प्रशासन नै चुनां पूरी चाल्ली सुतेंत्र ते साफ सुथरे ढंगै नै करोआना जकीनी बनाने लेई आदर्श आचार संहिता दी सख्ती नै अमलावरी शुरू करी दित्ती ऐ। बक्ख-बक्ख जिले दे जिला चुनां अफसरें जांच दल खडेरे न जेहूड़े आदर्श आचार संहिता दे नियमें गी लागू करने गी जकीनी बनाने दलेई पूरी संजीदगी कन्नै कम्म करा करदे न। इस दरान सियासी पाटिएं दिएं सब्बनें गतिविधिएं पर बी नेड़मी तक्क रखी जा करदी ऐ। पैहे दे नैन देन ते खर्च करने पर नजर रखने दे अलावा जिनें लोकें कश लसेंसशुदा थेआर बगैरा ऐन, उनेंगी बी ओ िआर सरबंधत पुलस थाने च जमा करोआने लेई आक्खी दित्ता गेदा ऐ।

<><><><><><>

Model CC Kathua

कठुआ जिला प्रशासन नै लोकसभा चुनाएं दी घोषणा दे बाद गै आदर्श आधार संहिता दे नियमें गी सख्ती नै लागू करना शुरू करी दित्ते दा ऐ। इस सिलसिले च कल जिला चुनां अफसरडॉ. राकेश मिनहास होरें फलांग्ग स्कावड दिएं टीमें गी रवाना कीता जेड़ियां जिले दे बक्ख-बक्ख हिस्सें च सरकारी इमारतें ते सरकारी संपत्तिएं परा बक्ख-बक्ख सियासी पार्टिएं दे इश्तेयार, पोस्टर, बैनर बगैरा हटा करदे न। डॉ. मिन्हास होरें कठुआ च

साढ़े जिला संवाददाता प्रदीप कुमार कन्नै गल्ल करदे होई आकखेआ जे चुनां पूरी चाल्ली साफ सुथरे, पारदर्शी, जवाबदेह ते बिजन कुसै फर्कोफर्की तोड़ चाढ़ने लेई जिले भर च लोड़चदियां कारवाइयां ते अभियान कनूनी नियमें तैहत चलाए जा'रदे न।

<><><><><><>

Arms Jammu

जम्मू जिला प्रशासन नै औंदे लोकसभा चुनाएं गी ध्यानै च रखदे होई जिले दे लसैसंशुदा थेआर रखने आले गी निर्देश जारी कीता ऐ जे ओ 7एं दिनें दे अंदर-अंदर अपने गिआर कन्नै दे पुलस थाने च जमा करोआई देन। जिला मैजिस्ट्रेट जम्मू सचिन कुमार वैश्य हुंदे आस्सेआ इस सरबंघै च जारी हुकमै च आकखेआ गेआ ऐ जे लसैसंशुदा थेआर 7एं दिनें दे अंदर अंदर थाने च जमा होई जाने लोड़चदे ते कन्नै जम्मू दे एसएसपी हुंदे लेई बी निर्देश ऐ जे ओ इस गल्लै गी जकीनी बनान जे इस हुकमै दी पालमा पूरी संजीदगी कन्नै कीती जा। गिआरें दा लसैस रखने आले दा नां मीडिया च शायी कीता जाग ते कन्नै एसएसपी, एसडीएम, तैहसीलदारें दे दफतरै ते पुलस थानें च बी उंदी लिस्ट लाई जाग।

<><><><><><>

Ramban Weapon

रामबन दे जिला चुनां अधिकारी बसीर-उल-हक-चौधरी होरें लसैस आले गिआर रखने आले सब्बनें लोकें गी औंदे लोकसभा चुनाएं गी दिक्खदे होई अपने थेआर 7एं दिनें दे अंदर-अंदर अपने नेड़े दे पुलस थाने च जमा कराने दा हुकम दित्ता ऐ। आकाशवाणी दे संवाददाता नै दस्सेआ ऐ जे जिला मैजिस्ट्रेट होरें सिविल ते सुरक्षा बलें दे रटैर ते सेवारत कर्मिएं गी जेहड़े रामबन जिले दे हदें दे अंदर रवै'रदे न, उनेंगी अपने लसैसंशुदा थेआर इस हुकम दे जारी होने थमां इक हपते च जमा कराने लेई आकखेआ ऐ। एह इक रोकथाम आली कनूनी गैह ऐ तां जे लोकसभा दे चुनाएं गी रमानदारी, शांति ते निरपक्खता कन्नै कराया जाई सकै। एहदे इलावा चुनां प्रक्रिया पूरी होने तगर गिआरें दे नमें लसैस जारी करने पर बी पूरी चाल्ली रोक रौहग।

<><><><><><>

NH-44

जम्मू श्रीनगर जरनैली सड़क पर रामबन च दलबास थाहरै सड़कै दी जरूरी मरम्मत आस्तै गड़िडएं दी आओजाई अज्ज बडलै थमां बंद करी दित्ती गेदी ऐ। सोशल मीडिया पर एहदे बारे जानकारी सांझी करदे होई ट्रैफिक पुलस नै दस्सेआ ऐ जे रस्ता साफ होने पर ट्रैफिक बहाल करी दित्ती जाग। उनें मुसाफरें गी ट्रैफिक अमलें कन्नै सैहयोग करने दा आग्रह बी कीता ऐ।